

էմ կ'ուտին, զձիու գեամ բերնէն էխան, էթուղ մեանչ ձիանցտա-
րուն: Քիւռիկ-Ջալալին զէն քեառսուն ձին էլ էտու յէռջիւ ա-
քիւցը, քեառսուն էլ էրաւ տիւս, զինք էն քեառսունը էմ կե-
րաւ:

Խանդիւթ խաթին լէ առից զԴաւիթ, կեացին տուն:

Տեսաւ՝ քեառսուն փէրիզ էնգեղ նստուկ ին. ինչ աչք կպաւ
Դաւթին, քեառսունի ձեռ ոտն էլ թիւլցաւ յախու:

Էնդեղ նստան խաց ուտիլ, գինի խմիլ:

Էնու մէկ աման կայ՝ էրկու կարաս կէս գինի կ'տանը, քեառ-
սուն ղիտը էլ խաց էր տրի գինու խիտ: Դաւիթն էր, նստաւ էն-
դեղ, էսաց.— Անուն Յիսուսին Քրիստուսին, անուն Աստուած, օխ-
նեցէք¹⁾ էսա խաց, նստինք, ուտինք:

Էսաց.— Մի միծ տիւ իս, բարի մէհլան²⁾, տիւ օխնը, յա-
ռաջն էլ տիւ կի:

Էսաց.— Իս օխնիմ, իս ուտիմ, տիւ սոված կ'մէք:

Էսաց.— Տիւ օխնը, տիւ կի. որ մնաց, մինք կ'ուտինք. որ
չմնաց, չինք ուտը:

Դաւիթ կցից³⁾ օխնիլ.— Հայ մեր, որ երկին, սուրբ եղեցի, ա-
նուն քո եկեցի, արքաութին քո ղեցի, կամ քու որպէս երկից ի
ւ'երկրից. զհազ միզ անապազ, զոր տուրտ միզ ասուր, թող զմի
պարտս միր, որպէս մի տանի միզի փորձըթընէ, ալ փրկեա զմիզ
ի չարէ, զի քու ի արքաութին, զօրութին, փառք յաւիտեանս ա-
մէն: Անուն Յիսուսին Քրիստուսին, անուն Աստուծուն Աստուած:— Էն
քեառսուն կռապաշտ ին, Աստըծու անուն չըն գիտը տայ:

Նստաւ, խաց կերաւ, իրանք բերան չ'տուին: Դաւիթ էնա
քեառսուն ղիտը խաց կերաւ, էրկու կարաս կէս գինին էլ մէկ
տեղ խմաւ: Քեառսուն մարդ ուրինց թրիւր չըփլըղըցին⁴⁾, տրին
սուփրի տակ. խօսքիւր մէկ էրին, ասին.— Դաւիթ խմաւ, սարխոչ-
ցաւ⁵⁾, քինի, զարկինք, սպանինք:

1) Օրհնեցէք: 2) Հիւր: 3) Սկսեց: 4) Մերկացրին: 5) Գինովցաւ: